



**Piginneqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaat (inissiat attartortittakkat allanngortinnerat, kaaviiartitsinissamut inerteqqut il.il.)**

(Ineqarnermut Attaveqaasersuutinullu Naalakkersuisoq)

(Siullermeerneqarnera)

Qujanaq Naalakkersuisut siunnersuummut.

Pingaarnerpaatut Demokraatit isumaqarput, siunnersuutit tamarmik, innuttaasut amerlanerit namminerisaminnik illoqalernissaannut tikkuussisut, tapersersortariaqartut. Aamma taamaappoq siunnersuummi uani, anguniakkamut ilaasariaqassammat pisortat illuutaasa attartortittakkat amerlanerusut piginneqatigiilluni inissianngortinneqarsinnaanerannut.

Tamassuma qanorluunniit kingunerissavaa, innuttaasut amerlanerit illusinerikkut nammineq illuminni ileqqaarsinnaalernerat. Aamma ilimagaarput, taanna piginnittuuneq kinguneqassasoq, inuup akisussaassuseqarnerulerneranik nammineerluni illugisami aserfallatsaaliuarnissaanut, taassumalu kingunerissallugu siunissami, nunatsinni illut pitsaassusaasa qaffannerat. Piginneqatigiilluni inissiaqarnissamut ileqqaarnerup kingunerissavaa, illumut piginnittoq imminut aningaasatigut pitsaanerusumik toqqammavissinera allamut nuussinnaanissaminut aamma immaqa illumut pigisaminut anginerlut, tamanna pisariaqartinneqalissagaluarpat.

Taamatuttaarlu pitsaasuvoq, piginneqatigiilluni inissianut allanngortitsinerup nassatarisussaammagu, Namminersorlutik Oqartussat kommuniillu illumut taakkununga ingerlatsinerlut aserfallatsaaliinermullu aningaasanik immikkoortitsisarunnaarissaat, taassumalu kingunerissallugu, aningaasat sipaarutigineqartut suliniutinut innuttaasunut iluaqtissatut atorneqarsinnaaneri.

Demokraatit maluginiarsimavaat ernummatigineqartut SIK-p tusarniaanermut akissummini saqqumiussai, isumaqataavugullu, aamma siunissami innuttaasoqassasugut, ajoraluartumik namminerisaminnik illutaarnissamut akissaqanngitsunik. Erseqqissarusupparpulli, periarfissaqarmat pisinissamut akissanik pisortanut iluatinnaatilinnik taarsigassarsisoqarsinnaanera. Taakku saniatigut pingaartuavoq, naqissusissallugu, maannakkut attartortuusut illuminnit anisitaajunnanngimmata, pisiarinissaa kissaatiginngikkunikku. Tamanna attartortunut qularnaveeqqutaavoq pitsaasoq.

Taakkununga oqaaseqaateqarluta siunnersuut takusinnaavarput namminerisamik illoqalernissamut annertusaataasinnaasoq, tamannalu taperserparput.

Siunnersuut taamatut oqaaseqaatitalerlugu Sanaartornermut ataatsimiititaliami suliareqqinneqarnissaanut innersuussutigaarput.